

I. Nom, scopo e sedia

Cul nom „Chasa Jaura“ Val Müstair, as constituescha a temp indeterminà üna società a sen dals art. 60 e seg. CCS cun residenza a Valchava.

La società vain inscritta aint il register da commerzi svizzer.

La società ha per scopo :

1. da ramassar, conservar ed expuoner ogets e documaints da valur culturala, istorica, linguistica, artistica e scientifica chi reguardan la Val Müstair e sias relaziuns cun utrò ;
2. da cultivar e mantgnair il stabilimaint dal museum ;
3. da promouwer e sustegner la perscrutaziun dals bains culturals da la Val Müstair, sco istorgia, lingua, scienza patria e tradiziuns popularas tgnand in ögl il passà, il preschaint e l'avegnir.

La società po da sia vart, cun decisiun da la suprastanza dvantar commembra dad otras organisaziuns ed associaziuns cun las medemmas o sumgliaintas meras per accumplir ils scopos cumünaivels.

II. Commembranza

I pon far part sco commembers da la società tuottas personas natüralas sco eir giuridicas da dret public o privat.

La società as cumpuona da :

1. commembers singuls
2. commembers collectivs
3. commembers a vita
4. commembers correspondent
5. commembers onuraris

La commemoranza vain acquistada sco commember singul, collectiv o a vita cul pajamaint da la contribuziun da commember, sco commember correspondent o onurari tras la nominaziun. Ella finischa cun il refusar il pajamaint da la contribuziun da commember o tras l'exclusiun.

III. Facultà

Il museum Chasa Jaura cun tuot quai ch'el rinserra, fuorma la facultà principala affidada a la società.

Implü vain la facultà da la società alimentada da las contribuziuns da commember, da donaziuns e subvenziuns, da las taxas da visitaduors e dal rechav da la vendita da publicaziuns. Il plü fuorma il museum patria cun seis s-chazis ch'el rinserra il plü custaivel patrimoni da la società.

La contribuziun da commembers consista in üna contribuziun annuala chi vain stipulada da la radunanza generala.

Persunas chi han merits speziels per la società o per las meras da quella, pon da la suprastanza gnir nomnadas commember correspondent o da la radunanza, sün proposta da la suprastanza, commember onurari. Ellas sun deliberadas da la contribuziun annuala, han però listess drets da commember.

L'an da gestiun va cul an da chalender.

Per tuots dovairs da la società respuonda unicamaing la facultà da quella.

IV. Organs

Ils organs da la società sun:

1. la radunanza generala
2. La suprastanza
3. Ils revisuors da quint

La radunanza generala ha lö minch'an in favrèr – marz. Ella vain convochada da la suprastanza. La bannida ha da seguir almain 8 dis avant tras invid personal e publicaziun aint il Mas-chalch; ella ha da cuntgnair la glista da las tractandas.

Mincha radunanza convochada in regla ais cumpetenta da trar decisiuns validas. Elecziuns seguan per scrutin. Decisiuns pon gnir evasas tras votumaziun averta. Scha la suprastanza o la radunanza dumandan, vain inchaminà al scrutin serrà.

Elecziuns seguan pro'l prüm scrutin cun magiurità absoluta, pro subseguaintas cun quella relativa. Decisiuns vegnan tuttas cun la magiurità da las vuschs, mincha commember singul o collectiv ha üna vusch. Pro parità da vuschs decida pro elecziuns la büs-cha, pro decisiuns taglia il president.

A la radunanza generala suletta aspettan ils seguaints affars statuarics:

1. l'elecziun dals scrutinaduors
2. Il trattamaint dal protocol annual
3. Il trattamaint dal rendaquint annual
4. la stipulaziun dal preventiv
5. La stipulaziun da la contribuziun annuala
6. L'elecziun dal president/a, da 4 commembers/as da la suprastanza e da 2 revisuors/ras da quint.
7. La nominaziun da commembers onuraris
8. L'evasiun da propostas da la suprastanza o da quellas da commembers inoltradas in scrit fin al plü tard la fin da december.
9. L'exclusiun da commembers
10. La revisiun dals statuts
11. Il schogliamaint da la società o müdadas da la fuorma da la constituziun da la Chasa Jaura.

Decisiuns a sen da las cifras 9 e 10 survart bsögnan üna magiurità da 2/3 da las vuschs. La radunanza generala po trattar definitivmaing be affars chi figüreschan sülla glista da tractandas publichada. Propostas fattas pür in la radunanza piglia la suprastanza incunter a deliberaziun ed eventuala evasiun opür a man da la prosma radunanza generala. La radunanza ha solitamaing lö in la sala da la Chasa Jaura.

Radunanzas generalas extraordinarias po la suprastanza convochar seguond bsögn a qualunca temp. Ella sto convochar üna tala sün dumanda inoltrada in scrit dad almain 1/5 dals commembers. In quist cas ais ella da convochar infra ün mais davo entrada la dumonda.

Radunanzas generalas ordinarias ed extraordinarias per decider davart il schogliamaint da la società sun da bannir tras charta racumandada. Solitas tschantadas da commembers per predeliberar affars da plü gronda portata, sco eir a scopo scientific, orientativ o propagandisc, po la suprastanza convochar tenor bsögn a qualunca temp e lö. Talas radunanzas nun han il dret da trar decisiuns impegnativas, pon però far propostas a la suprastanza.

La suprastanza ais l'organ executiv ed administrativ. Ella as cumpuona dal president e da 4 commembers elets per üna perioda electorala da 3 ons e reelegibels. La suprastanza as constituëscha svesa, relascha seis uordens d'affars e stipulescha il program da lavur.

La suprastanza po seguond bsögn e scopo nomnar cumischiuns temporarias o permanentas cun incumbenzas spezialas. A quistas pon far part eir na commembers da la società. La suprastanza po eir tenor bsögn e scopo instituir decasteris spezials ed impiegar funcziunaris.

Pro l'instituziun da cumischiuns e decasteris e pro l'impiegamaint da funcziunaris stipulescha ella eir lur funcziunaris tras regulativs spezials, decida davart lur eventuala indemnizaziun e piglia incunter lur rapports.

La lavur da la suprastanza vain per regla prestada gratuitamaing, pero cun dret d'indemnizaziun da las expensas. La suprastanza vain convochada dal president tenor bsögn o scha almain duos da seis commembers dumandan. Ella po trar decisiuns validas schi sun preschaints almain 3 commembers cumprais il president.

Il/la president/a maina las radunanzas e sedutas. El/Ella evada la corrispondenza da la società, tantinavant chi nun as tratta dad affars surlaschats a cumischiuns o decasteris. Il/la president/a represchainta la società invers l'extern e firma sulet. In affars chi impegnan la società firma el/ella collectiv, insembel cun ün ulteriur commember da la suprastanza.

L'actuar/a es a medem temp eir vicepresident/a. El/Ella maina exact protocol da las radunanzas e sedutas ed assista al president pro l'evasiun da la corespondenza.

Il chaschier o la chaschiera administrescha la chascha e maina la contabilità

Il/la conservatur/a e bibliotecar/a vain tschernü/da da la suprastanza. Sias funcziuns vegnan fixadas in ün regulativ spezial.

Ils revisuors o las revisuras da quint repassan a la fin da l'an da gestiun l'intera contabilità da la società e dan rapport in scrit a la suprastanza a man da la radunanza generala.

V. Schogliamaint da la società

Il schogliamaint da la società o la müdada da la fuorma d'organisaziun da la Chasa Jaura po gnir tratta in consideraziun be scha quista proposta vain sustgnüda da la mittà dals preschaints ad üna radunanza generala. La proposta ha sün quai da gnir suottamissa ad üna cumischiun da stüdi chi referischa lasupra ad üna prossma radunanza. Il schgogliamaint o la müdada da la fuorma d'organisaziun bsögnan üna magiurità da $\frac{3}{4}$ da las vuschs.

In cas da schogliamaint va l'intera facultà da la società al Cumün da Val Müstair, chi l'administrescha fin chi as constituescha ün'otra organisaziun cun medems o simils scopos.

VI. Disposiziuns finalas


Ils preschaints statuts sun gnüts revis da la radunanza generala dals 1. avrigl 2016 ed aintran a medem temp in vigur. Els rimplazzan ils statuts approvats da la radunanza constitutiva.

Per la suprastanza

Il president


Marco R. Gilly

l'actua


Ursina Feuerstein